



Վահան Տեղյան

Ես սիրում եմ քո մեղավոր աչքերը խոր

Ես սիրում եմ քո մեղավոր աչքերը խոր,

Գիշերի պես խորհրդավոր.

Քո մեղավոր, խորհրդավոր աչքերը մութ,

Որպես թովիչ իրիկնամուտ:

Քո աչքերի անծայր ծովում մեղքն է դողում,

Որպես գարնան մթնշաղում:

Քո աչքերում կա մի քնքուշ բախտի վերհուշ,

Արբեցումի ոսկե մշուշ:

Մոլորվածին անխոս կանչող փարոսի շող,

Քո աչքերը հոգի տանջող:

Ես սիրում եմ զգվող-անգութ աչքերդ մութ,

Որպես գարնան իրիկնամուտ:

1904-1905